

Pierrette Bérengier

Conte



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

LOU MAS DI CHABRIE

Ero bon de camina au soulèu, coume acò! I'avié tant de tèms que l'esperavo aquéu moumen benesi. Voungé long mes, voungé long mes dins la tristo vilasso pièi, enfin, despièi aièr, lou païs, lou soulèu, lis erbo e li pèiro. Lis amavo aquéli draïou roucassous dóu planestèu di Gras. Païs cauquié, atapa à perdo de visto de pèiro blanco, de muraïo à pèiro seco e de clapié.

Ero bon de camina au mitan di clot de ferigoulo e de lavando. Emé li cade e li bouis, tout acò sentié qu'embaumavo!

Aro, lou soulèu picavo; leva quàuqui cigaloun, lou mounde di bèsti s'èro amudi. Plus rên; èro soulet, lou Pèire, tout soulet e s'espoumpissié d'aire, de soulèu, de calour.

Uno chaminèio pounchejavo entre dous auciprès. Ero lou mas famous, di Chabrié. N'i'avien talamen parla au vilage, mai jamai avié fa tira tant liuen. Enfin, pèr lou proumié cop, l'anavo vèire de proche aquéu mas.



Un gros mas, un mas gros coume tout un amèu, un mas que dès famiho i'aurien tengu à l'aise. Vuei, un vièi ome e sa sorre, tout soulet em'un chin e tres cat. Plus ges de galino, plus ges de cabro, èron trop vièi pèr n'en teni.

Soulet, tóuti dous, dins aquel oustalas, aurias poussu crèire que vivien ensèn. Que noun! I'avien counta, au vilage, que s'èron leva la paraulo un jour que lou chin de l'Ernestou avié empassa uno galino de la Fineto. S'èron leva la paraulo, e pèr toujours. Acò fasié...? Oh, fasié talamen tant de tèms... Lou jouine medecin se rapelavo plus, tout pichot deja, èro ansin. Vint an, de segur mai!...

Tout à-n-un cop ausis darrié d'un cade, uno voues que lou sono:

- "Moussu, moussu, me poudrias pas ajuda? I'a tres jour que li contro-vènt de moun fraire soun barra, i'es belèu arriba quicon. Siéu souleto, ai pas la forço d'escranca

la porto. Se vous plais, moussu...”

Segur que l’anavo ajuda, lou Pèire! Pamens chifravo... Vint an emai mai que se viravon l’esquino dins un oustau coupa en dous. Quàuqui brico, un pau de gip e vaqui,

se vesien plus, s’ausissien plus, èron countènt... Vint an emai mai... e vuei, la Fineto que s’inquieto de soun fraire. Curious...

Pèire ié douno lou bras e l’ajudo camina dins li caiau e li róumi. L’ajudo, mai, i’a de tèms qu’a plus fa autant d’esfors la Fineto. Arribado au mas, pòu plus faire avans. S’assèto sus lou buto-rodo, just en fàci de la crous de pèiro.

Pèire passo soulet lou pourtau...

Que fai bon aqui, que fai fre dins aquesto cour souloumbrouso e barrado coume uno clastro. La grosso figuiero, un pau de moufo: un autre mounde!

Mounto lèu lis escalié moufu e s’embrounco dins un cors agroumeli. La Fineto... La mort remounto bèn à dous o tres jour...

Pèire coumprèn plus. S’entorno e sort en courrènt vers lou bon soulèu de Diéu. A besoun de revèire la lus, de senti li pèiro caudo e la ferigoulo.

Sus lou buto-rodo, plus degun.

Au pèd de la crous de pèiro, un vièi ome barbassu e sourrisènt lou regardo. Pèire lou counèis pas, mai a besoun de parla en quaucun:

- “Vène de trouba la Fineto morto dins lis escalié.”

- “Ah, elo tambèn?” ié vèn l’ome toujours sourrisènt.

- “Elo tambèn?...”

- “Vo, siéu soun fraire, l’Ernestou; restave aqui, de l’autre coustat dóu mas, mai siéu mort i’a tres jour...”

E lou vièi ome s’envai, à pichot pas, em’un risoulet.



- “Pèire! Pèire! Ah, siés aqui, bèu bon Diéu! Despièi uno ouro que te cercan de pertout, poudiés pas respondre?”

Noun, Pèire poudié pas respondre. Alounga d’esquino au pèd de la crous, poudié plus respondre...

LA CROUS DIS ABIHO

- “Lis as visto, vuei, eilà? Te fan pas tant li fiero coume aièr, que? Emé l’Auro, te tènou uno petufo... sorton pas lou bout de soun aguioun!”

- “Vo, quand pense, aièr, de coume fasien li poumpouso. E de te veni aleteja soute lou nas, coume s’èron souleto d’agué d’alo!... E de te zounzouneja, em’un acènt de l’autre mounde... E vuei, pftt... un pau de vènt, e te li vaqui touto esfoulissado!... Es acò lou courage!”

- “A moun vejaire, acò tèn de ço que soun pas au miés emé soun mèstre. Regardo, pèr nautre es pas parié: sabèn que riscan pas rèn. Nòsti brusc soun caviha aqui despièi de cènt e de cènt an, vira au bon soulèu, bèn apara pèr lou coulet. Es li rèire-rèire-grand di rèire-grand dóu mèstre que lis avien planta aqui. Nous es jamai rèn arriba. Ah, segur que soun vièi nòsti brusc: un paure pege cava à la grosso em’uno lauso pèr tout cubert. L’avèn pas tout lou counfort à la mouderno, pamens ié sian bèn.

Cade an lou mèstre verifico li lauso, s’an pas resquiha, se tapon bèn. Nautre ié fasèn fisanço, sabèn que la naturo nous fara jamai de mau.”

- “Avèn jamai davala vers la baisso. Belèu qu’avèn jamai pougneu d’Oulandés, mai avèn un terraire bèn à nautre. Despièi de cènt e de cènt generacioun sian enracinado à noste Còu de Peyre, à nòsti séuvo, à nòsti mountagno. Eli, pecaire, rèn pèr se ié restaca. Te soun arribado d’aièr. Pas lou tèms de rèn aprene e tournaran parti. Creses qu’es uno vido, acò, pèr d’abiho? Te bouton emé li brusc dins un camioun e zóu! milo metre plus aut, en quàuquis ouro. Pièi, cercas-vous de sap, cercas-vous de flour, pipas ço que voulès, basto que faguessias de mèu, e iéu... farai de sòu.”

- “Pecaireto, fin finalo soun mai de plagne que de crida. Soun mèu ié raubon pèr lou chabi is estrangié. Nautre, ié dounan à noste mèstre, sara pèr la famiho, pèr li gènt de la mountagno o bèn pèr quàuqui touristo meritous e bèn causi.”

- “Tè, un brut de mecanico. Un 30... Mai, es éu, l’ome d’aièr. Ounte vai?”

- “Oh!... Regardo, vèn vèire sis abiho. Verifico que soun bèn... Regardo sis castelet s’an fa targo à l’Auro... Li mignoutejo... meme que ié parlo! Mai alor, éu peréu,

que lis amo sis abiho?..."

- "Ou, ve, lou mèstre qu'arribo tambèn. Ié vai touca la man?... Se parlon?... Escouto... parlon de tempèsto e pièi... de flour. Tè, meme que sèmblon bèn d'acord. An fa ami."

L'endeman, dins un soulèu bèn caudet, à cha milo, lis abiho s'envoulèron ensèn. Li mèstre avien fa ami, que voulès... Li mountagnolo menèron li pichòti nouvello vers li sap que sabien que i'avié encaro un pau de pousso d'or à culi. Ié moustrèron lis esclargiero ounte troubarien li flour li mai melicouso. Ié diguèron meme soun secrèt: lou pendis ounte, dins quàuqui semana, troubarien li proumiéri mato de bruge enflourido!...

E pièi... e pièi ié diguèron encaro, la vièio crous de Peyre, en fàci; ié diguèron coume, quouro lou soulèu es à mand de trecoula, soun ombro vèn touca l'ombro de la chaminèio de la fermo, e qu'olor es l'ouro de se recata.

Qu'èro bello la mountagno! Coume èro abelano!

Li jour passèron e li flour, n'i'avié pèr tóuti. Fauguè pamens tourna dins la baisso. Fauguè pamens se recata pèr lou gros ivèr sus la mountagno. Pau enchau, quand i'a l'espèr de se trouba.

- "An, zóu! à l'an que vèn!"

- "Remountaren, proumés."

LI ROCO DE SATAN

Ero poulido la crous de pèiro, à la flour di camin, en plen mitan di bos, en aquéu bèu matin de primo. Touto daurado, fiero sus sa mount-joio, leissavo li proumié rai dóu soulèu se pausa sus si bras. Uno ginesto ié daurejavo au pèd. D'aucelet ié fasièn l'aubado e un pau plus liuen de cantarello l'espinchavon de dessouto lis aguio de pin. Tout èro siau. Un bèu jour coumençavo; lis aucèu lou sabien...

- "Vaqui la crous, es bèn aqui que se sian di. Es pancaro arrriba, mai n'i'a pas pèr long-tèms", se pensavo la chato qu'arribavo sourrisènto.

Emé soun calignaire se devien trouba pèr uno longo espacejado dins li bos. Elo, avié quita soun oustau proun d'ouro e ié fasié rèn d'espera un pau, souleto au pèd de la crous. Li bos, li mountagno, li roucas, èro soun paradis. S'assetè pèr miés aprouficha li darriéri ginesto qu'embaumavon e li castagnié que coumençavon carga si catoun. Uno agasso ié venguè faire babau pièi s'entournè. La chato levè lis iue vers la toure eilamount. Se ramentè de l'istòri que se countavo dins lou païs: uno istòri dóu tèms di Crousado, em'un chivalié, uno bello castelano, lou diable... basto, uno istòri de l'autre mounde. Pamens la fin la leisavo toujours soucitouso. Lou diable venié carga li pèiro de la toure, disien, e quand n'i'aourié plus, sarié la fin dóu mounde...

S'oubourè, culiguè quàuqui vióuleto e se gandiguè vers li pin pèr cerca de celou, fin de passa lou tèms.

Lou tèms passè. Passè meme trop. Elo, tournè au pèd de la crous e aubourè mai lis iue vers la tourre.

- "Tè, se diguè, li rèsto di muraio sèmblo que soun plus tant aut coume adès... Curious..."

Regardè sa mostro. Sarié tèms qu'arribèsse, quand meme, l'Andreloun.

A-n-aquéu moumen, se ramentè d'un libre dins sa pòchi, lou coumencè de legi.

Lou soulèu mountavo que mai. Ausiguè d'esquerlo e bèn lèu un troupèu passè. De fedo emé quàuqui cabro foullasso. Un ome jouine li menavo vers d'àutri terro. De vèspre tournarien davala vers la jasso...

En passant proche, la chato ié faguè signe de la man, sènso muta. Tout d'uno un brut amount... de roco que barrulon, un chafaret dóu diable. Se regardèron, regardèron la tourre, un pau de tubado, o bèn de pússo? Curious... Ié faguè mai signe de la man. Elo, ié respoudegùè d'un riset, regardè pièi sa mostro.

- "E d'aquel Andreloun qu'arribo toujours pas."

Lou soulèu picavo. Un pau plus liuen avisè d'erbo mouflo, à l'oumbreto. I'anè, s'aloungùè, barrè lis iue, reveguè la tourre, soun calignaire, lou pastre, lou libre, e mai soun calignaire.

- "Oh, lou libre, que l'ai leissa au pèd de la crous."

L'anè querre. L'aureto avié vira fuiet. Lou libre se devinavo dubert à la pajo 666. Ero la fin d'un chapitre. Legiguè:

"- Em'acò s'ausira un chafaret dóu diable, un pastre passara emé soun avé, e de mounde i'aura plus.

Ansin disié lou vièi Tibetan."

Lou chafaret, lou pastre, la fin dóu mounde, tout acò viravo dins sa tèsto. Curious...

A-n-aquéu moumen, avisè Andriéu, soun Andreloun que davalavo.

- "Hòu, hòu!... Moun Andreloun, coume siéu contento qu'arribes. Coumençave de me prene pòu. Figuro-te que..."

A flour e mesuro que parlavo, l'Andriéu risié, risié... mai risié!

Alor, coumprenguè tout.

- "Oh, noun! es pas vrai, digo... es pas vrai, siés pas... Pas tu..."

Eu dins qu'un cacalas s'esvaliguè.

- "Oh, noun! moun Andreloun... Alor, lou vièi Tibetan avié resoun?..."

L'endeman la retribèron au pèd de la crous. "Mort naturalo" diguè lou legisto. Pamens, lou jour de l'enterramen, noutèron qu'Andriéu, lou calignaire, èro pas vengu...

Tout acò viravo dins sa tèsto. Curious...

L'ANUNCIO

Lou vièi oustau es à vendre.

Lou vièi oustau di lauso argentalo, emé soun jardinet e soun gros castagnié.

La mamet es morto, lou papet a parti pèr l'espitau. Plus degun, lou vièi oustau es à vendre...



Lou vièi oustau es vendu. Lou vièi oustau, quaucun l'a croumpa.

Li fenèstro se tornon durbi, lis erbo folo soun segado. Lou gros roumias que barravo lou camin a dispareigu; la vido, pau à cha pau, torno au founs de la valèio Tastovin. un tros dóu cubert de lauso es petassa de téule trop rouge; pau enchau, n'i'a que pèr un tèms.

Pèr un tèms, vo. L'oustau dèu retrouba soun biais d'avans, tout parié coume dóu tèms dóu papet e de la mamet, dóu tèms que lou païs se cresié sèmpe drud, dóu tèms que li gènt i'èron encaro urous.



Pamens la guerro èro aqui. Pau se n'en rapello d'aquéu vèspre d'autouno. Plouvié, avié debana de cènt e de cènt de kiloumetre despièi sa Walounio natalo, avié manca de peri cènt cop, e arribavo dins aquéli Ceveno liéuro, que ié voulié trouba recate. Uno chaminèio tubavo. Avié pica à la porto. Uno mameto, souleto, l'avié vist talamen las, talamen afangala e triste que l'avié fa rintra. Tout simplamen.

Lou papet dounavo i cabro. Quouro tournè, diguè:

- "As bèn fa." Tout simplamen.

D'aquéu jour, Pau avié plus quita l'oustau e lou païs, dins soun cor, l'avié fa siéu.

Lou vièi reloge que degrunavo si proumiéris ouro de liberta, ié ramentavo aquéu de si grand, au cor dóu Borrinage. Avié tout leissa eilà. Sa famiho qu'avié peri, soun oustau

aclapa di boumbo, plus rên pèr lou retene amount. Sa vido, d'aro en lai, sarié touto d'aquéu païs, sarié touto de roco e de castagno.

Un jour l'autre, li dous vièi ié countèron soun fiéu, coume l'avien tuia, eilà liuen, sus lou front. Restavon tout soulet sus terro. L'oustau, lou jardin, quàuqui cabro e li castagnié, èro aqui tout soun bèn.

Pau li voulié ajuda, voulié adóuta aquelo famiho que l'avié aculi coume un fiéu manda dóu cèu. Ero di, partirié plus jamai, proumés...

Pièi un matin, eilà dins li bos, s'èro ausi uno mitraiado. Pau, à miejour, avié pas rintra. Rintrarié plus jamai.

Li dous vièi esperèron long-tèms, long-tèms.

Li touristo dóu nord venien de mai en mai noumbrous, subre-tout li Belge. Pièi un jour l'oustau se barrè...



Lou noutàri de l'endré que sabié l'ana dóu mounde, faguè pas li crido dins li journau dóu païs. Noun, un oustau parié interessarié miés un estrangié que pagarié mai, lou sabié.

Pau legissié "La voues dis Ardeno" quand, d'asard, sis iue toumbèron sus l'anuncio: "valèio Tastovin", "Ceveno", soun cor prenguè lou tifo-tafo. Eu que menavo pichot, coume bouscatié dins lis Ardeno, tout d'uno sa decisioun fuguè presso. Croumparié. Falié parti lèu. Croumparié aquel oustau, lou voulié pèr ço que de causo ansin se capiton pas dous cop, e l'oustau, l'avié couneigu entre li rego. Tout ié disié qu'èro lou siéu.

Maugrat si proumesso, i'avié faugu parti, i'a bèn de tèms es vrai. Avié plus agu de novo dóu papet ni de la mamet. De soun coustat, i'avié jamai escri. Lou regretavo, ié pensavo souvènt, mai poudié pas. Cènt cop avié vougu, mai falié pas, lou sentié. Sa vido eilà, s'èro roumpudo un jour d'estiéu de 194...

Mouri sus plaço o viéure aiours. Sa decisioun l'avié presso, sènso retour poussible. Avié fa targo, mai vuei tout aquéu pichot mounde que s'èro basti, barlico-barloco, s'afoundravo. Ié falié tourna eilà, quita mai sa Walounò, tourna dins aquéu païs qu'un jour avié fa siéu. Falié escafa li lònquis annado de separacioun; falié retrouba belèu lou papet e la mameto. Belèu.



Pèr un d'aquéli miracle que se dison pas, pousquè croumpa lou bèn. Tant lèu signa davans lou noutàri, se i'èro istala e à forço de travai e de voulounta avié redouna vido à l'oustau, à la terro.

E vuei quete bèu jour qu'èro pas! Li ginesto avien flouri pèr aculi lou papet qu'anavo querre à l'espitau. L'anavo aculi dins aquel oustau qu'èro esta siéu, tant de tèms e ounte l'avié aculi, mié-siècle plus lèu.

Lou gardarié eici, fin qu'au darrié badai, mai avans, ié falié faire lou roumavage que s'èro toujours enebi. Vuei, lou sentié, poudié e devié tourna sus aquéu serre que i'a mié-siècle sa vido avié cabussa.

Jouine eisila, ajudavo au trin d'oustau tant que poudié e au travai de la terro. Fasié tout lou plus dur pèr aléuja lou papet. Aquéu jour d'aqui, se n'en ramento, avié agu idèio d'ana vèire un bos que i'avien di, sus l'autre pendis dóu serre de Fau, liuen, forço liuen. Avié pres un courchoun de pan, uno toumo e fai tira!

Mai un pau avans miejour, quouro lou soulèu coumençavo de daureja lou founs de la valèio, tout à-n-un cop avié ausi un brut de pas, de voues rauco e uno longo mitraiado. Soun sang avié fa qu'un tour. A quàuqui cano d'éu, au pèd d'un castagnié gigant, tóuti li cor èron amoulouna. Pàuri jouvènt que voulien resta libre dins un païs libre. Pàuri jouvènt qu'avien fisa sa vido à la mountagno e i bos. Pàuri jouvènt sega pèr de moustre incounsciènt, vendu qu'èron esta pèr d'àutri jouine que cresien sis ami, si fraire.

E éu, Pau, qu'avié tout vist, qu'èro temouin, lou soulet temouin. Estoufè lou crid que i'escapavo e mita-fòu, partiguè liuen, liuen, vers lou nord.

Tout acò se lou repassavo.



Guerro finido, s'èro istala dins d'àutri bos, amount dins lis Ardeno negro. A cade aubre que toumbavo, pensavo au castagnié gigant... Noun, ié falié plus pensa.



Vuei, se sentié un autre ome, proun fort pèr revèire lou passa. Caminè long-tèms, long-tèms dins li draïou abouscassi que plus degun ié passavo. Retroubè l'endré emé si roucas empara e si ginesto. Lou castagnié gigant, éu, avié crema quàuqui dès an plus lèu, quouro d'Alemand en vacanço s'èron di de faire fiò pèr soun dina... Tout simplamen.

Lou castagnié avié crema e li roure e li pin. Restavo plus pas rèn, qu'uno crous de pèiro que ramentavo à Pau perqué pèr un triste jour, i'avié faugu quita lou païs.

LOU LAU NEGRE

Un, dous, tres, pièi encaro la femo emé sa fiho. Tóuti mort, tóuti assassina. L'ome lis avié tira coume de porc-fèr. La pouliço, la justico, tout lou mounde se meteguè en bousco. Res. L'ome avié dispareigu.

Ié disien Louis vo Louviset. Li lengo tubavon: istòri de vedèu pas paga, disien lis un, istòri de femo e marrit basarrutàgi, disien lis autre; istòri d'acò e dóu rèsto, n'i'avié pèr tóuti. A cadun sa soulucion, mai LA soulucion, degun la poudié douna ferme. Degun poudié dire de monte avié passa lou Louis.

Fau saupre que dins lou païs aut, li bos soun drud e immense. Lou Louis, li couneissié tóuti d'à-founs. Li fau, li sap marca d'un carra blanc brouda de blu em'uno chifro au mitan, ié disien tóuti quaucarèn. Aquéli marco de proupieta, pèr éu, avien tóuti un noum: Bouscatié, Champeyroux, Pradello, etc... Meme lis aubre di fourèst doumanialo li couneissié e lis amavo. Pàuris aubre qu'an pas de mèstre à tèsto d'ome, que sarien toumba sènso manco saupre pèr quau devien mouri, éu, Louviset, troubè aqui la meiouro di sousto.

Li bèsti, n'avié pas pòu. La Bèsti dóu Gevaudan, avié legi dins de gros libras serious qu'eisistavo plus e meme, tant, qu'aurié jamai eisista... La sóuvagino, péu o plumo, li sabié tóuti pèr soun noum. Sabié tambèn que i'adurrien pitanço emé lis erbo e quàuqui racino. L'aigo, acò, n'i'a sèmpe dins nosto mountagno.

Ansin li jour passèron, pièi li mes, lis an...

Cerco que cercaras.

Degun troubè jamai lou Louis. Un jour meme, avien ausi peta un cop de fusiéu e s'èro di que, lou Louis...

D'ùni aguèron de peno: "un brave ome, disien, que lou marridùgi dis autre l'avié buta..."



Cerco que cercaras.

Li siècle avien passa... Vuei, es lis arqueoulò que cercavon. Lou vièi prouffesseur, i'avien di qu'à tèms passa la planeso, d'ome ié restavon, de la famiho dicho de l'Esperou. Cercavo li marco, li provo d'aquelo civilisacioun esperounenco. En cavant, troubè li tros d'uno crous de pèiro frejo e coumprenguè que la legèndo disié just, que la legèndo èro que l'istòri messo en pouèsio.

Cerco que cercaras.

Cavo que cavaras.

Troubè ansin, bèn plega dins uno telo de plasti (uno matèri qu'avié fa flòri dins li tèms ancian e que se degaiavo gaire), bèn plega dounc, dins de plasti, uno vièio armo, un fusiéu de casso, coume se n'en troubavo dins li cartabèu dóu siècle XX.

En la desplegant, precouciounous, ié troubè, peréu, uno boutiheto de vèire em'un papié roula dintre. Lou fauguè mena au labò pèr lou legi sènso que toumbèsse en pousso. I'avié marca à l'encre blu: "Quand vous tuias à bèl esprèssi, tout soulet, plegas pas voste fusiéu." Ero signa: L.....

Cavo que cavaras.

Troubè, pas liuen, lou vièi prouffesseur, uno pichoto bouito cavado dins de cade dur, bèn councervado. Gardavo, elo peréu, soun secrèt. Lou labò n'en sourtiguè un papié escri, se vesié qu'èro pas de la memo man. Li letro mai roundo disien qu'èron d'uno femo. Li sabènt legiguèron: "L'ai rescountra, l'ai ama. Quand pousquè plus supourta lou meichantùgi dóu mounde, me demandè de l'ajuda e l'ajudère. Tuiè jamai degun." Acò 'ro dins un parla vièi d'uno isclo celtico, que vuei, plus degun ié restavo despièi que, quàuquis annado plus lèu, un nivoulas dóu diable i'avié tout fa peri.

De marco sus lou papié disien que la femo plouravo en escrivènt. Lou vièi prouffesseur coumprenguè alor perqué, tout proche, i'avié aquéu pichot lau, tout round, qu'uno legèndo, uno vièio legèndo que remountavo à cinq o sièis siècle, afourtissié qu'es di lagremo de tristun e de maluranço d'uno chato que soun aigo tenié aquelo tencho encre.

Cavo que cavaras.

Lou vièi prouffesseur troubè pièi un jour, d'os esparpaia dins la terro, sènso caisso. Li sabènt dóu labò diguèron qu'èron d'uno femo bloundo e pas mai...



Lou vièi proufessour, éu, avié soun secrèt. Pas liuen d'aquélis os avié trouba un anèu d'argènt, fa de dos man que tenien un cor courouna. Se souvenguè de quouro èro jouine e de soun viage d'estùdi dins aquelo isclo meravihouso justamen, e vuei enebido en tóuti. I'avié ausi de la bouco d'un vièi pescadou l'istòri d'uno bago que s'èro chabido à milié, dins un vilage, quàuqui siècle plus lèu. N'avié vist d'aquélis anèu dins li museon. Se disié: lou cor pèr l'amour, la courouno pèr la fidelita e li dos man pèr purgi o bèn pèr retene lou cor, acò segound coume èro enfilà sus lou det.

Un jour que countavo tout acò à-n-un jouine estudiant, ié moustrè l'anèu rauba i labò e i teinician.

- "Sabe bèn, ié venguè, sabe bèn iéu, sènsò analiso estraordinàri, qu'aquel anèu, la chato bloundo esmarrado dins li bos, l'avié vira sus sa man, pèr uno bello niue de pleno luno, uno niue d'avoust qu'avié rescountra un ome qu'èro pas un assassin.

L'ARCOULA

L'avié ausido, Benezet, la voues dóu cèu. L'avié ausido e l'avié seguido. I'èro ana vèire lou Papo. L'avié basti lou pont demanda, qu'aro encambavo fièr, lou flume rèi. Avié óubei, Benezet, noste sant. Mai quau vous a pas di qu'en quitant si mountagno avié leissa, eilamont, uno pastrihouno descounsoulado.

Vuei, avié plus degun, la Melicou, pèr ié teni coumpagno quouro gardavo. Avié degun pèr ié pourta ajudo quouro s'enroumiassavo o quouro d'asard, d'ùni cabro foullasso sautavon faisso e bartas. E pièi, tout ié venié en òdi, à la Melicou, lou tèms duro trop d'un soulèu à l'autre quand sias souleto...

Ié revenguè, un jour, un dire de Benezet:

-S'un cop as lou làngui, penso à iéu e conto-me uno istòri.

Aquéu jour d'aqui, justamen, la Melicou proun d'agué cabreteja de roco en roco se viéoutlavou au pèd de la crous de pèiro de ferre dins l'erbo enflourido. N'avié plen lis iue de tóuti aquéli coulour que dóu blu dis iue de l'enfant Jèsu au rouge di gau-galin, dóu vióulet di pensado à l'or di ginesto, dóu verd de l'erbo tendrinello au vert encre di sapin ié ramentavo l'arc dóu cèu après la plueio.

Li flour, li coulour, uno istòri... Pensè mai à Benezet. Se ramentavo proun d'uno istòri qu'èu l'avié jamai acabado. Aquelo istòri de Dono Blanco emé si bèlli raubo broudado d'or l'avien talamen facho pantaia la Melicou... L'or, elo, sabié ço qu'èro, de pampaieto n'avié agu vist dins la ribièro. E Benezet l'avié di, Dono Blanco, si péu n'èron clafi de pampaieto... Mai, pecaire, l'avié jamai acabado de counta plus liuen que l'acidènt, aquelo istòri...

Perseguido qu'èro pèr de maufatan de sourdat, uno pèiro i'avié manca souto lou pèd, just coume sautavo la cascado i bouco dóu Rèi-Pic. Avié cabussa au founs de l'orre

trau negre dóu volcan e se sarié tuiado proun qu'un brave chivalié passèsse d'aquí just à-n-aquéu moumen. La culiguè, partiguèron ensèn, pièi... aquí Benezet avié pas jamai acaba...

E aro, tout ço que se ramentavo la Melicou, es que Dono Blanco en toumbant, sa cherpo sedouso s'èro acroucado à-n-un roucas e qu'avié resta aquí, batudo dis aigo. Avié apoundu, Benezet, qu'es desempièi que cade jour, quouro lou soulèu douno, sus l'aigo dóu Rai-Pic se pòu vèire tóuti li coulour de l'arcoulan e qu'es desempièi tambèn, que ié dison "l'arc de sedo"...

SOUTO LIS AUCIPRES

La grand prado verdejavo; li biòu rouge souto lou sause de la font boulegavon pas. Tout istavo mut. Souleto, lis aigo cascaiejanto e li riéu cantavon en davalant vers li jardin, proche lou castelas. Dins lou carrat long de sa fenèstro, lou vièi Oulivié remiravo soun bèn. Soun cor boumbounejavo rèn que de pensa i jardin talamen bèn ourdouna, coume lou rèi Enri lis amavo, e talamen drud e clafi de tout.

En fàci, sus l'autre pendis, uno vigno s'espoumpissié, d'aise au bon dóu soulèu, e just en dessus, cinq auciprès s'estampavon sus lou negre dóu roucas e lou blu dóu cèu.

Toujour, quand li vesié, lou vièi Oulivié se ramentavo de l'istòri que i'avié counta sa grand, e toujours mai s'esmóuvié de la malastrado de la gento damiseleto de Fontclaro.

Guihaumeto, que ié disien, à-n-aquelo chato poulido que troubavo li jour trop long dins lou vièi castelas de pèiro de ferre, lou vièi castelas de Cros-Pèiro, tout negre, au bout de la prado, en fàci la font... lou vièi castelas mounte, éu, Oulivié, troubavo aro li journado bèn longo, peréu...

D'aquéu tèms que s'èron pancaro tuia pèr lou Bon Diéu, li jouvènt freirinejavon, galoi, d'un castèu l'autre. De l'autro man de la mountagno, au mitan di castagnié e di ginesto, lou grand castèu dóu Bos-Long segnourejavo, fièr e galant. Li fèsto i'èron ufanouso e Guihaumeto, un jour que picavo la bourrèio, troubè lou jouine comte Grabié proun galant tambèn. Tout acò bèu pamens, mascavo uno noublesso gaire argentado e quouro la Guihaumeto cridè soun amour fòu pèr Grabié, soun paire ié faguè d'empache e, d'aquéu tèms, quouro lou paire avié parla...

Aguè bello de prega e de suplica, sa maire aguè bello de prega e de suplica em'elo, lou segneur de Fontclaro embarrè sa damisello dins lou castèu negre de Cros-Pèiro.

Amouroso e tèsto duro coume li roco dóu païs, elo, rebutè tóuti li pretendènt e un

bèu jour, soun Grabié emé quàuqui jouvènt foulas, travessèron la mountagno, la venguèron rauba emé sa maire e li menèron tóuti dos dins un pichot castelet, escoundu sus l'abrò de la plus poulido ribiero que siegue. Mai la lèi es la lèi. Fuguè enebi en tóuti li capelan de marrida lou parèu e lou paire faguè lou sèti dóu castelet que tenguè gaire.

Vai ansin que Guihaumeto fuguè mai embarrado dins lou castelas negre, dóu tèms que sa maire mountavo acaba si jour dins uno abadié de pèiro roso, sus li serre aut, en plen mitan d'uno fourèst negro e aloubatido.

Li jouvènt fuguèron tóuti penja, leva de Grabié qu'uno bono fado l'avié ajuda s'escapa...

Guihaumeto se leissè mourir soto la chaminèio. Soun paire n'aguè pièi de regrèt e pleguè velo gaire après. Soulet lis auciprès marcon vuei, lou souveni d'aquéli amour malurous. Soun ombro aparò Guihaumeto e soun paire, sa maire belèu... Grabié, éu, lou retribèron rege, au pèd de la crous de pèiro dentelado, en fàci dóu Bos-Long, un jour que li ginesto sentien qu'embaumavon.

Dins lou castèu negre de Cros-Pèiro lou vièi Oulivié regardo li bièu inmouBILE. L'ombro toumbo sus la prado. InmouBILE li bièu... inmouBILE tambèn lou vièi Oulivié, e pèr sèmpe...

A empourta soun afecioun pèr la damisello soto lis auciprès que l'aparon, éu emé sa mouié e touto la famiho de Serre. Pounchejon, aquéli auciprès, au bout dóu jardin tant ama, proche li brusc. Quand lou soulèu trecolo, soun ombro seguis l'ombro dis auciprès de la damisello pèr marca la memo ouro, l'ouro de la pas eterno.

CLASSO 1828 - NUMERO 157

Louis-Felip èro Rèi di Francés mai dins li Grad de Labaumo, Rèi o pas Rèi, falié viéure.

Aquéu jour d'aquí, lou soulèu caufavo la crous de pèiro escrinçelado à la flour di camin. A quàuqui metre d'aquí, un oustalas de pèiro blanco s'acoucounavo soto sa téulisso rousenco. Tout à l'entour, bèn encabanado dins si paret à pèiro seco, li terro labourivo s'espoumpissien de soulèu pèr miés reçaupre quàuqui cese, quàuqui pese o quàuqui liéume estiven. D'àutri carrat verdejavon deja de blad tendre entre mitan lis óulivié e uno pognado de vigno esparpaiado entre li clapas.

Antòni Escudié remiravo aquéli pàuri terro, qu'emé soun paire, un autre Antòni, e soun fraire cadet Pèire, ié fasièn bèn rendre ço que poudien.

Quàuqui jour pus lèu, avié tira lou 157, se n'en tiravo escàpi, partirié pas. Festejè emé si coumpan de la classo 1828 pièi reprenquè sa vido atravalido dins li Grad.

Dous an passèron. La classo 1830 tirè. Dins un vilage proche, lou jouine Jan-Louis Lapèiro aguè lou 42. Marrit numerò, falié parti. Tristun dins la famiho, lou paire avié besoun de soun einat pèr l'ajuda abarri li fraire e li sorre. Avié quàuqui sòu, avié de bèn, tenié à soun fiéu, pas questioun que partiguèsse: pagarié.

Pagarié un remplaçant, mai ounte lou trouba? A la fiero de Jueso, un brut courrié: dins li Grad, la fermo dis Escudié, de bon renom pamens, fasié pas flòri. Se disié meme que l'einat partirié se l'escasènço se presentèsse, leissarié la plaço au cadet.

Lou paire Lapèiro faguè faguè à dous; quitè lou prad de fiero e se gandiguè, barling-barlango, dins li camin peirous que ribejon la ribiero e Baumo. Travessè de richi terro aseigado e escalè pièi sus lou planestèu cauquié. Aqui, un gros oustalas, basti sus la roco douminavo la valèio e li terro richo. Lou doumaine d'aquéu mas, éu, èro darrié, liuen de l'aigo, au mitan di peirasso. La terro èro bono, vrai, mai lou travai qu'acò demandavo èro pas de dire. Falié despeira pèr trouba la terro dessouto. Falié mounta clapas e paret pèr alarga un pau la proupieta. Lou travai èro pas pèr espauri aquéu mounde e fin finalo s'èron farga, à la man, uno bello proupieta. Mai d'enfant, n'i'avié sèmpe mai e l'einat fuguè urous d'aquelo vesito. Quouro lou Simoun Lapèiro ié demandè de remplaça soun fiéu Jan-Louis à l'armado, es sènso chancello que ié diguè de vo.

Anèron davans lou noutàri, Mèste Vachalde e passèron un ate óuficiau d'engajamen militari.

L'Antòni Escudié partirié dounc tout lou tèms que faudrié e soun paire e éu, se partejarien la soumo de 1250 franc, pagado pèr Simoun e Jan-Louis Lapèiro.

L'ate dis que pèr garanti lou pagamen, li Lapèiro devrien ipoteca soun oustau e si terro que s'espandissien sus tres coumuno: de terro labourivo, de camp, de vigno, d'amourié pèr li magnan, de jardin, de castagnié, d'aubre fruchau, de bos e de bouissiero.

L'ate porto li noum di Lapèiro e di temouin: Francés Urban Cellié e Jousè Begot marchand à Jueso. Antòni Escudié, éu, signè pas que sabié pas. I'a pas d'escolo procho, pèr li pichot di Grad...

Tout acò fuguè signa pèr un bèu jour de mars de 1831.

Tres an passèron...

Dins li Grad, l'oustau dis Escudié menè soun trin. Paire e fiéu cadet travaïavon pèr abali proun ounourablamen la famiho. La Baumo cascaiavo au dabas. Eli, remiravon aquéli richi terro d'en bas... e despeiravon si Grad. Couneissien pas l'envejo. Si besoun èron pas di gros.

L'einat se lagnavo pas d'agué quita l'oustau. Sourdat au 15° Regimen d'Infantarié de Ligno, vesié de païs, s'èro fa d'ami, aprenié forço en travessant manto uno encountrado. Vesié de terro sènso pèiro, sènso fedo, sènso cabro e sènso vigno... De terro que li gènt ié parlavon uno lengo estràni mai lis ami, éli, parlavon coume éu o

quâsi. Rintrè au païs en semèstre, valènt à dire en permissioun. N’aproufichè pèr tourna davans Mèste Vachalde lou 19 de mars de 1834. Simoun e Jan-Louis Lapèiro ié baièron li proumié 700 franc. Guihaume Saussoin dóu Tourrel de Planzollo e Pèire Rous de Laval, n’en poudien pourta testimòni. Aquelo soumo l’ajudarié quouro tournarié dins si Grad, aquelo soumo poudié deja ajuda la famiho.

Antòni Escudié tournè rassegura e urous à soun engajamen.

1835, lou 21 de desèmbre.

Mèste Vachalde duerb la porto de soun estùdi. Jan-Louis Lapèiro es aqui, tèsto souto, l’aire triste e geina. Vèi, asseta dins lou burèu, lou jouine Pèire, cadet dis Escudié e lou paure paire. Sis iue porton lou dòu coume touto sa persouno.

Lou sourdat Antòni Escudié pèr soun segound semèstre avié reçaupu lou coumplemen di cinq mandadis di 14 de jun, 23 de juliet, 20 de setèmbre e 3 de desèmbre de 1834 e dóu 22 de janvié 1835, pèr un toutau de 292,90 centime. D’acò, en aquéu triste jour de novèmbre de 1835, Antòni Escudié-paire, emé soun fiéu cadet, baièron quitanço à Jan-Louis Lapèiro. Ié dounèron tambèn quitanço pèr uno soumo de 70,25 franc que se partejèron paire-fiéu, estènt di e marca que lou paire toucarié l’interès sa vido durant, lou capitau revendrié pièi au cadet dis Escudié, lou Pèire, que se retroubarié ansin cap d’oustau en aguènt perdu, dins l’annado 1835, un fraire einat qu’avié tira lou bon numerò...

La quitanço pèr aquéu capitau dato dóu 27 de juliet de 1836. Li temouin, lou fiéu Cellié de La Bachèro e lou Jan Dumas poudrien afourti davans lou mounde que Simoun Lapèiro e Jan-Louis Lapèiro èron quite.

Simoun e Jan-Louis Lapèiro èron quite davans lou mounde e davans la lèi, mai long-tèms pensèron à-n-aquéu paure Antòni Escudié di Grad de Labaumo qu’avié paga de sa vido d’èstre plus paure, trop paure...

Ié pensèron long-tèms... e leissèron dins un tiradou, bèn apara dóu ratun, l’ate d’engajamen e li quitanço pourtant timbre reiau, perfin que si felen un jour sachèsson en quau devien aquel aujòu, resta en vido pèr la gràci de Diéu e ... d’Antòni Escudié.

Vuei, quouro aquéli rèire-felen trèvon li Grad, en bousco de ferigoulo, d’aspi, dins li sentour di bouis e di cade, au mitan d’aquéli clapas abousouna, sènso vido, sènso plus ges de culturo, quouro veson aquel oustalas vuege, dubert à touto auro e que ié dison “l’oustau dóu penja”, podon que pensa à-n-Antòni Escudié e à si rèire-nebout que quitèron un jour l’oustau famihau en ribo de Baumo, que quitèron aquéli mur qu’avien viscu lou dramo d’un rèire que couneiguèron jamai e que belèu avié trouba lou double di quitanço passado pèr soun ouncle Antòni, davans Mèste Vachalde de Jueso...

ERO UN CAPEU FLOURI

O, qu'èro poulit lou capèu de la Maricou emé tóuti si flour. L'avié croumpa à la capitalo, just avans de veni. La capitalo... despièi quant d'annado i'èro, la Maricou? Coumtavo: ... tres, quatre... Deja quatre an!

Se rapelavo de si proumié sòu gagna e qu'avié autant lèu manda à si gènt pèr basti un mur e un pourtau afin d'enclaire l'oustau e soun ort. Coume sarié aquéu pourtau? Lou sabié bèn, la Maricou, que sarié round, lou pourtau de pèiro duro, e que soun paire i'aurié fa grava sis inicialo E.L., couma tóuti dins lou païs, em'uno dato: 1903.

1903, l'annado de si proumié sòu... Dóu capèu au pourtau, ansin vanegavon lis idèio de la Maricou...

Lis aubre, li riéu e li roucas fusavon à la vitesso dóu trin que la ramenavo vers li siéu. Deforo, devinavo lou prefum dóu Vivarés ferigoula, mai se languisié de vèire lou proumié castagnié, la proumiero mato de bruge que marcarié lou païs di roco cristalino, soun païs à-n-elo...

Tut, tut...

Lou proumié castagnié venié de passa emé quàuqui ginesto. "Largentièro!" cridavo l'ome dóu Camin de ferre, "Largentièro!"

La Maricou, touto apetegado, avisè lou paire Sauset emé la carriolo que la menarié au vilage. Recampèron tóuti sis afaire, malo, maletto, sacco, saqueto e saquetoun, e barlingo-barlango, li vaqui long de Ligno, à l'abrò de la ribiero di pampaieto, sus lou camin que serpentejo. Aqui, de castagnié, de féuse, de bruge, n'en vos, vaqui n'en...

Arribavo, la Maricou, sus la plaço de la font mountado: uno carriero, la Grand Carriero, e au bout l'oustau e soun poulit pourtau...

Se lassavo pas de sarra li siéu sus soun cor, ni de touca la pèiro duro dóu pourtau. E.L 1903, coume l'avié pensa. Un pourtau de bos flame nòu e coupa de bono luno, que dins li siècle dirié i felen de si felen, qu'elo, la Maricou, en 1903, s'èro gagna quàuqui sòu... E dessus lou pourtau, li poulit téule rose que lou couifavon.

Que lou couifavon?... Mai... en parlènt de couifa... e lou capèu flouri dins soun cartoun rouge e blu?... Mai noun, i'èro pas dins la carriolo dóu paire Sauset... Segur que sarié resta à la garo...

L'endeman, la Maricou tournè à la vilo...

Mai quau vous a pas di, qu'èro d'estiéu, qu'èro li vacanço e que dis emplega remplaçant, la Maricou couneissié degun. Pamens n'avisè un qu'avié bon biais, jouine, galant, es à-n-éu qu'anè demanda.

- "Perdoun, Moussu... un capèu flouri... dins un poulit cartoun rouge e blu?... aièr... vo..." E tremoulavo la Maricou, davans lou bèl emplega, que semblavo talamen brave...

Sachèron jamai coume lou retribèron lou capèu flouri dins soun cartoun rouge e blu, mai ço qu'es segur es que lou retribèron.

Aro, la man tremoulanto de la Maricou lou tenié aquéu cartoun rouge e blu qu'uno outro man tremoulanto, lou tenié tambèn...

- Madamisello... belèu... que... se voulias...

Ero touto esmougudo, la Maricou, e lou Jousè tant galant e tant brave, éu tambèn, èro esmougu. Ero d'estiéu, l'avèn di, en desèmbre li marridèron.

D'aquéu capèu flouri, dins soun poulit cartoun rouge e blu! Quand disès di causo, pamens!...

A prepaus d'un bi-centenàri...

Lou 14 de febríe de 1793, fuguè vouta lou decret que proumetié uno grosso soumo à-n-aquéu que farié denóncio d'un prèire refratàri. A l'ócasioun d'aquéu triste bi-centenàri, voulèn ramenta l'istòri vertadiero de l'Abat Sevenié.

NOSTO-DAMO DE DELIEURANÇO

Noun. Avié pas fa sarramen noste bon curat Sevenié. Avié pas renega; e aro, lou sabié, falié paga. Falié s'escoundre, falié fugi lou marridugi dis un, lou nescige dis autre.

Aquéu vilage de la Ceveno, lou couneissié proun, n'en sabié tóuti lis oustau, tóuti li croto e si bos avien ges de secrèt pèr éu. Lou Ron de Coucouludo, eilamout segnourejava e fasié signau. Mino de rèn, s'aubouravo dre vers lou cèu e vous rapelavo, de longo, qu'eilamoundaut quaucun viho sus vous. Lou bon curat avié fisança dins si parrouquian. Que siguèsson dóu cap-liò o bèn de Sant-Martin o dóu Chamboun, tóuti o quàsi, à-de-rèng ié dounèron la retirado. Pamens, un jour, li sourdat mountèron de la valèio, venien de la vilo, de la vilasso, e voulien rèn saupre. La lèi es la lèi. Li curat devon faire sarramen, es ansin, senoun...

Senoun... ié rèsto que de prega e d'espera. L'abat Sevenié, preguè emé soun vicàri de nebout, preguè e esperè. De croto en clapié, de feniero en estable, finiguèron tóuti dous pèr s'emboussassi. De jour e de niue, li sourdat fousiguèron lou païs. De-bado. De jour e de niue assajèron de faire parla lou mounde. De-bado. Degun mutè pas.

Eilà, dins li castagnié, l'ouuncle e lou nebout vivournejavon. Un lapin que se prenié dins uno lèco, quàuqui celou, de castagno boullido fasié sa joio. Tèms en tèms, un cassaire esmarra ié leissavo dous cabecou o un cantoun de pan. Li sourdat, las, avien moula dins si recerco mai avien proumés de tournalèu.

Un matin, li premiéri parpaiolo de nèu toumbèron sus lou masage dóu Chamboun. La font avié caia e falié davala. L'ivèr se sarravo, plus poussible de viéure dins li bos.

L'Abat Sevenié se diguè de tourna dins lou bas-païs cauquié, pas tant fre e que i'avié sa famiho. Quitè sa parròqui de Vaugorgo emé soun nebout e s'endraièron tóuti dous vers Chapia, soun vilage nadau, en plen planestèu di Gras.

I'arribèron pèr un poulit jour d'autounado. Lou païs ensouleia ié semblavo caud. De clapié e de paret à pèiro seco s'expandissien à perdo de visto qu'avien recata touto la calour dóu soulèu d'estiéu. Plus d'aubre à pan, plus de celou mai encaro quàuqui vigno à rapuga, quàuquis ensalado fero, de ferigoulo, de mentastre, de coudoun, d'agreno e de poumo sauvajo. Tout en caminant, l'ouuncle e lou nebout se poudien pas empacha de garda lou nas au sòu coume chin rabassié; se ramentavon trop di cacalaus de pèiro que s'acampavon à boudre dins l'endré. D'aquéli pèiro clauvissouso que vous dison la vido dóu mounde despièi de cènt e de milo an. La proumiéro que troubèron li pivelè. Touto caudeto e roundo e liso coume uno mióugrano, se la passavon l'un l'autre coume se fuguèsse un relicle sant.

La famiho lis aculiguè emé joio mai li sourdat de la Republico, aqui peréu, roudavon. La lèi es la lèi. Un jour agantèron lou jouine nebout. Bonur que se pousquè faire passa pèr un varlet de fermo.

Se mesfisèron que mai e lis ami de la famiho ajudèron. Pamens, un vèspre de l'ivèr, tournèron aquéli sourdat dóu diable e manquèron de gaire de faire bono casso. Urousamen, d'un oustau l'autre, d'uno bouco l'autro, acò se saupeguè e la famiho, un cop mai, risquè tout pèr sauva l'Abat Sevenié e soun nebout Jan-pèire. Dins la salo grando d'uno vièio mamet, dins lou cantoun fàci la chaminèio, se devinavo un armàri d'angle coume es de modo dins lou païs. L'ouuncle e lou nebout passèron darrié e preguèron. Se diguèron meme que se la Santo Vierge voulié bèn que sauvèsson sa vido, ié bastirien uno capello e, quouro lou sourdat en aguènt passa soun espaso soto l'armàri e en aguènt rèn senti, cridè: I'a pas dengus, alor, éli sachèron que la capello, la bastirien.

Falié pamens espera de jour meiour. Se recatèron, enca mai isoula, dins uno croto soto un bàrri de roucas, escoundudo dins li bartas, liuen dis oustau. Lou tèms passè, em'acò, en fasènt plus tant mèfi, lou vièi ouuncle se faguè pessuga. Mena à-n-Aurenjo e encarcera, fuguè pièi relarga contro forço sòu.

Li tèms èron meiour... avans de tourna dins sa parròqui mountagnolo, coumencèron de basti la capello de Nosto-Damo de Deliéuranço. Lou vièi ouuncle

defuntè en 1814 e lou nebout acabè, soul, l'obro piouso.

Lou jour qu'inagurèron la capello, Nosto-Damo moustrè miracle sus un enfantoun malaut. Devié pas èstre lou darrié cop. Moustrè souvènt miracle, Nosto-Damo de Deliéuranço de Chapia. Talamen bèn, que lou jouine abat Sevenié tournè cade mes de sa mountagno pèr dire messo à la capello, fin qu'en 1830 que ié fuguè nouma en plen.

Si cendre repauson vuei, dins la gleiseto de pèiro blanco coume maubre, bastido sus la capello. Li roumiéu ié van à mouloun crèisse cade 8 de setèmbe. E s'un cop i'anas, tambèn, en sourtènt de Nosto-Damo de Deliéuranço, óublidés pas de faire tira dre vers lou baus, à 400 mètre d'aquí: uno outro Nosto-Damo vous espèro. Ié veirés uno tourre de pèiro, uno porto. Dessus: ND dóu TS Rousàri pregas pèr nautre. Uno lauso vous dira tambèn qu'aquelo tourre fuguè aubourado en 1880. Butas la porto. Un cacalausoun de pèiro, seissanto escalié e quouro sourtirés, amount, au pèd de l'autro Nosto-Damo... Miracle! Aquí, lou païs tout entié espelis davans vous. De clouquié n'en vos, vaquí n'en: un, dous, tres,... n'en coumtarés un vintenau. E quau vous a pas di qu'eilà liuen, soutu Coucouludo que fai sèmpe signau, se devino tout pichounet, perdu dins la brumo e lis bos, lou clouquié de Vaugorgo, lou clouquié que l'Abat Sevenié e soun nebout faguèron campaneja tant de cop.

Dous siècle an passa ... Nosto-Damo mostro sèmpe miracle mai quau se souvèn d'aquéu que jamai reneguè sa Fe.

Peireto Berengier

Laurac, lou 13 d'óutobre de 1992.

Tèste integrau

Còpi interdicho

Reserva pèr aquéli qu'an la licènci d'utilisacioun

C.I.E.L. d'Oc

Centre International de l'Écrit en Langue d'Oc

Sèti souciau:
3, plaço Joffre - 13130 Berro.

Tóuti dre reserva - Tous droits réservés - All right reserved.

© **Centre International de l'Écrit en Langue d'Oc - 1998**

© Adoubamen dóu tèste: Peiret Bérengier

de la meso en pajo

e de la maqueto pèr Tricìo Dupuy

en sa qualita de mèmbe dóu Counsèu d'Amenistracioun dóu CIEL d'Oc.